

南史

二十五



列傳第六十三

南史七十三



孝義上

龔穎

劉瑜

董陽

賈恩

郭世通

子原平

嚴世期

吳達

潘綜

陳遺 秦綿

張進之

俞僉 張楚

丘傑

師覺授

王彭

蔣恭

徐耕

孫法宗

范叔孫

吳國夫

卜天與

弟天生

許昭先

余齊人

孫棘

妻許 徐元妻許 錢延慶

何子平

崔懷順

王虛之

顧昌衍 江柔之 江鞠

吳慶之

蕭叡明

鮮于文宗

蕭矯妻羊

羊緝之女佩任 蔣雋之妻黃

吳康之妻趙 吳翼之母丁

會稽陳氏三女 永興概中里王氏女 諸暨屠氏女 吳興公濟妻姚 吳郡范法恂妻褚

公孫僧遠

吳欣之

韓係伯

丘冠先

孫淡

華寶

薛天生 劉懷胤

解叔謙

宗元卿 匡昕

曹康祚

謝昌寓

韓靈敏

劉颯

弟謙 柳叔夜

封延伯

陳玄子 邵榮興 徐生之

范安祖

文獻叔 李聖伯

范道根 譚弘寶 何弘 陽黑頭 王績祖 郝道福

王文殊

樂頤之

弟頤 沈昇之

江泌

庾道愍

族孫沙彌 沙彌子持

易曰立人之道曰仁與義夫仁義者合君親之至理實忠孝之所資雖義發因心情非外感然企及之旨聖哲貽言至於風離化薄禮違道喪忠不樹國孝亦愆家而一代之眚權利相引仕以勢招榮非行立乏嗥翔之感棄捨生之分霜露未改大痛已忘於心名節不變戎車遽爲其首斯並軌訓之理未弘汲引之塗多闕若夫情發於天行成乎已捐軀捨命濟主安親雖乘理闇至匪由勸賞而宰世之人曾微誘激乃至事隱閭閻無聞視聽考于載籍何代無之故宜被之圖篆用存旌勸今搜綴湮落以備闕文云爾

### 龔穎傳

龔穎遂寧人也少好學益州刺史毛璩辟爲勸學從事璩爲譙縱所殺故佐吏並逃云穎號哭奔赴殯送以禮縱後設宴延穎不獲已乃至樂奏穎流涕起曰北面事人云不能死何忍舉觴聞樂蹈跡逆亂乎縱大將譙道福引出將斬之道福母即穎姑也跣出救之得免及縱僭號備禮徵又不至乃脅以兵刃執志終無回改至于蜀平遂不屈節其後刺史至輒加辟引歷府參

軍州別駕從事史宋文帝元嘉二十四年刺史陸徽表穎節義遂不被朝命終於家

### 劉瑜傳

劉瑜歷陽歷陽人也七歲喪父事母至孝年五十二又喪母三年不進鹽酪號泣晝夜不絕聲勤身力以營葬事服除二十餘年布衣蔬食言輒流涕常居墓側未嘗暫違宋文帝元嘉初卒又元嘉七年南豫州舉所統西陽縣人董陽三世同居外無異門內無異煙詔榜門曰篤行董氏之間蠲一門租布

### 賈恩傳

賈恩會稽諸暨人也少有志行元嘉三年母亡居喪過禮未葬爲隣火所逼恩及妻栢氏號哭奔救隣近赴助棺櫬得免恩及栢俱燒死有司奏改其里爲孝義里蠲租布三世追贈恩天水郡顯親左尉

### 郭世通傳

郭世通會稽永興人也年十四喪父居喪殆不勝哀家貧傭力以養繼母婦生一男夫妻恐廢侍養乃垂泣瘞之母亡負土成墳親戚或共賻

助微有所受葬畢傭賃還先直服除後思慕終身如喪者未嘗釋衣帽仁孝之風行於鄉黨隣村小大莫有呼其名者嘗與人共於山陰市貨物誤得一千錢當時不覺分背方悟追還本主錢主驚歎以半直與之世通委之而去元嘉四年大使巡行天下散騎常侍袁愉表其淳行文帝嘉之敕榜表門閭蠲其稅調改所居獨楓里爲孝行焉太守孟顓察孝廉不就

子原平字長恭又稟至行養親必以己力傭賃以給供養性甚巧每爲人作正取散夫價主人

南傳卷二十二

設食原平自以家貧父母不辦有肴味唯殮鹽飯而已若家或無食則虛中音日義不獨飽頃日暮作畢受直歸家於里糴買然後舉爨父篤疾彌年原平衣不解帶口不嘗鹽菜者跨積寒暑又未嘗睡卧父亡哭踊慟絕數日方蘇以爲奉終之義情禮自畢塋壙凶功不欲假人本雖巧而不解作墓乃訪邑中有營墓者助人運力經時展勤父乃閑練又自賣十夫以供衆費窀穸之事儉而當禮性無術學因心自然葬畢詣所買主執役無懈與諸奴分務讓逸取勞主人

不忍使每遣之原平服勤未嘗暫替傭賃養母有餘聚以自贖既學構家尤善其事每至吉歲求者盈門原平所起必自貧始既取賤價又以夫日助之及父喪終自起兩間小屋以爲祠堂每至節歲常於此數日中哀思絕飲粥父服除後不復食肉高陽許瑤之罷建安郡丞還家以綿一斤遺之不受瑤之乃自往曰今歲過寒而建安綿好以此奉尊上下耳原平乃拜而受之及母終毀瘠彌甚僅乃免喪墓前有數十畝田不屬原平每至農月耕者怕裸袒原平不欲

南齊書卷之三

五

使人慢其墳墓乃買家資貴買此田三農之月輒束帶垂泣躬自耕墾每出賣物裁求半價邑人皆共識悉輒加本價與之彼此相讓要使微賤然後取直宅上種竹夜有盜其筍者原平遇見之盜者奔走墜溝原平乃於所植竹處溝上立小橋令通又採筍置籬外隣里慙愧無復取者宋文帝崩原平號慟日食麥餅一枚如此五日人曰誰非王臣何獨如此原平泣而荅曰吾以見異先朝蒙褒贊之賞不能報恩私心感動耳又以種瓜爲業大明七年大旱瓜瀆不復通

舩縣令劉僧秀愍其窮老下瀆水與之原平曰  
晉天大旱百姓俱困豈可減溉田之水以通運  
瓜之舩乃步從他道往錢唐貨賣每行來見人  
牽隸未過輒迅檝助之已自引舩不假旁人若  
自舩已度後人未及常停住湏待以此爲常嘗  
於縣南郭鳳隸助人引舩遇有鬪者爲吏所錄  
鬪者逃散唯原平獨住吏執以送縣縣令新到  
未相諳悉將加嚴罰原平解衣就罪義無一言  
左右大小咸稽顙請救然後得免由來不謁官  
長自此乃始脩敬太守蔡興宗臨郡深加貴異  
以私米饋原平及山陰朱百年妻各百斛原平  
誓死不受百年妻亦固辭會稽郡貴重望計及  
望孝盛族出身不減祕著明帝泰始七年興宗  
欲舉山陰孔仲智子爲望計原平次息爲望孝  
仲智會土高門原平一邦至行欲以相敵會明  
帝別敕用人故二選並寢興宗徵還都表其殊  
行舉爲太學博士會興宗薨事不行卒於家三  
子一弟並有門行

### 嚴世期傳

嚴世期會稽山陰人也性好施同里張邁等三



人妻各產子歲飢欲棄而不舉世期分食解衣以贍其乏三子並得成長同縣俞陽妻莊年九十莊女蘭七十並老病無所依世期餽之二十年死並殯葬宗親嚴弘鄉人潘伯等十五人荒年並餓死露骸不收世期買棺殯埋存育孩幼宋元嘉四年有同奏榜門曰義行嚴氏之門復其身徭役蠲租稅十年

### 吳達傳

吳達吳興烏程人也經荒飢饉係以疾疫父母兄嫂及羣從小功之親男女死者十三人達時

南傳卷十三

病困隣里以葦席裹之埋于村側既而親屬皆盡唯達夫妻獲全家徒四壁立冬無被袴晝則傭賃夜則伐木燒塲妻亦同達此誠無有懈倦達夜行遇猛獸猛獸輒下道避之暮年中成七墓葬十三棺隣里嘉之葬日悉出赴助送終之事亦儉而周禮達時逆取隣人夫直葬畢衆悉以放之達一無所受皆傭力報荅焉太守張崇之三加禮命太守王韶之擢補功曹史達以門寒固辭不就舉爲孝廉

### 潘綜傳

潘綜吳興烏程人也孫恩之亂祆黨攻破村邑  
綜與父驃共走避賊驃年老行遲賊轉逼驃驃  
語綜我不能去汝走可脫幸勿俱死驃困乏坐  
地綜迎賊叩頭曰父年老乞賜生命賊至驃亦  
請賊曰兒年少自能走今爲老子不惜死乞活  
此兒賊因斫驃綜抱父於腹下賊斫綜頭面凡  
四創綜當時悶絕有一賊從傍來相謂曰卿欲  
舉大事此兒以死救父云何可殺殺孝子不祥  
賊乃止父子並得免鄉人祕書監丘系祖廷尉  
沈赤黔以綜異行薦補左戶令史除遂昌長歲

滿還家太守王韶之臨郡發教列上州臺陳其  
行跡及將行設祖道贈以四言詩元嘉四年有  
司奏改其里爲純孝里蠲租布三卅又宋初吳  
郡人陳遺少爲郡吏母好食鎗底飯遺在役恒  
帶一囊每煮食輒錄其焦以貽母後孫恩亂聚  
得數升恒帶自隨及敗逃竄多有餓死遺以此  
得活母晝夜泣涕目爲失明耳無所聞遺還入  
戶再拜號咽母豁然即明後又有河南孝廉秦  
綿遭母喪送葬不忍復還鄉人爲作茅菴仍止  
其中若遇有米則食粥無米食菜而已哀號之

聲行者爲之潛淚服訖猶不還家遇疾不療卒  
臨亡告人曰若死者無知固不宜獨存有知則  
大獲吾志

### 張進之傳

張進之永嘉安固人也爲郡八族少有志行歷  
五官主簿永寧安固二縣領校尉家世富足經  
荒年散敗救贍鄉里遂以貧罄全濟者甚多大  
守王味之有罪當見收逃避進之家供奉經時  
盡其誠力味之嘗避地墮水沈沒進之投水拯  
救相與沈淪久而得免時劫掠充斥每入村抄  
暴至進之門輒相約勒不得侵犯其信義所感  
如此元嘉初詔在所蠲其徭役又孫恩之亂永  
嘉太守司馬逸之被害妻子並死兵寇之際莫  
敢收藏郡吏俞僉以家財冒難棺斂逸之等六  
喪送致都葬畢乃歸鄉里元嘉中老病卒時又  
益州梓潼人張楚母疾命在屬續楚祈禱苦至  
燒指自誓精誠感悟疾時得愈見榜門口孝行  
張氏之間易其里爲孝行里蠲租布三世身加  
旌命

### 丘傑傳

丘傑字偉時吳興烏程人也十四遭喪以熟菜有味不嘗於口歲餘忽夢見母曰死止是分別耳何事乃爾茶苦汝噉生菜遇蝦蟆毒靈牀前有三丸藥可取服之傑驚起果得甌甌中有藥服之下科斗子數升丘氏世保此甌大明七年災火焚失之

### 師覺授傳

師覺授字覺授南陽涅陽人也與外兄宗少文並有素業以琴書自娛於路忽見一人持書一函題曰至孝師君苦前我而不見捨東奔歸聞家哭聲一叫而絕良父乃蘇後撰孝子傳八卷宋臨川王義慶辟為州祭酒主簿並不就乃表薦之會卒

### 王彭傳

王彭盱台直瀆人也少喪母元嘉初父又喪亡家貧力弱無以營葬兄弟二人晝則傭力夜則號感鄉里並哀之乃各出夫力助作塋塋須水而天旱穿井數十丈泉不出墓處去淮五里荷擔遠汲困而不周彭號天自訴如此積日一旦大霧霧歇塋竈前忽生泉水鄉隣助之者並嗟

神異縣邑近遠悉往觀之葬竟水便自竭元嘉九年太守劉伯龍依事表言改其里爲通靈里蠲租布三卅

### 蔣恭傳

蔣恭義興臨津人也元嘉中晉陵蔣崇平爲劫見禽云與恭妻弟吳晞張爲侶晞張先行不在本村遇水妻息避水移寄恭家時錄晞張不獲禽收恭及兄協付獄科罪恭協並款舍住晞張家口而不知劫情恭列晞張妻息婦之親親今有罪恭身甘分求免兄協協列是戶主求免弟

恭兄弟二人爭求受罪郡縣不能制依事上詳州議以爲並不合罪後除恭義成令協義招令

### 徐耕傳

徐耕晉陵延陵人也元嘉二十一年大旱人飢耕詣縣陳辭以米千斛助官振貸縣爲言上當時議以耕比漢卜式詔書褒美酬以縣令大明八年東土飢旱東海嚴成東莞王道蓋各以私穀五百餘斛助官振卹

### 孫法宗傳

孫法宗一名宗之吳興人也父隨孫思入海澨

被害屍骸不收母兄並餓死法宗年小流迸至  
十六方得還單身勤苦霜行草宿營辦棺槨造  
立冢墓葬送母兄儉而有禮以父死不測入海  
尋求聞世間論是至親以血瀝骨當悉凝浸乃  
操刀泔海見枯骸則刻肉灌血如此十餘年臂  
脛無完皮血脉枯竭終不能逢遂衰經終身常  
居墓所山禽野獸皆悉馴附每麋鹿觸網必解  
放之備以錢物後忽苦頭創夜有女人至曰我  
是天使來相謝行創本不關善人使者遠相及  
取牛糞煮傅之即驗一傳便差一境賴之終身  
不娶饋遺無所受宋孝武初揚州辟爲文學從  
事不就卒

### 范叔孫傳

范叔孫吳郡錢唐人也少而仁厚周窮濟急同  
里范法先父母兄弟七人同時疫死唯餘法先  
病又危篤喪屍經日不收叔孫悉備棺器親爲  
殯埋又同里施夫疾病父死不殯范苗父子並  
亡范敬宗家口六人俱得病二人喪沒親隣畏  
避莫敢營視叔孫並爲殯瘞躬卹病者皆得全  
鄉曲貴其義行莫有呼其名者宋孝武建初

除竟陵王國中軍不就義興吳國夫亦有義讓  
之美人有竊其稻者乃引還爲設酒食以米送  
之

### 卜天與傳

卜天與吳興餘杭人也父名祖宋武帝聞其有  
幹力召補隊主從征伐封關中侯歷二縣令天  
與善射弓力兼倍容貌嚴毅笑不解顏文帝以  
其舊將子使教皇子射元嘉二十九年爲廣威  
將軍領左細仗元凶入弒事變倉卒舊將羅訓  
徐牢皆望風屈謝天與不暇被甲執刀持弓疾

南傳六十三

十三

呼左右出戰徐牢曰殿下入汝欲何爲天與罵  
曰殿下常來去云何即時方作此語只汝是賊  
手射劬於東堂幾中逆徒擊之臂斷乃見殺其  
隊將張弘之朱道欽陳蒲與天與同出拒戰並  
死孝武即位贈天與龍驤行軍益州刺史謚曰  
壯侯車駕臨哭弘之等各贈郡守給天與家長  
稟子伯宗殿中將軍明帝泰始初領幢擊南賊  
於赭折戰沒伯宗弟伯興官至南平昌太守直  
閣領細仗隊主昇明元年與袁粲同謀伏誅天  
與弟天生少爲隊將十人同火屋後有一坑廣

二丈餘十人共跳之皆度唯天生墜天生乃取  
實中苦竹剡其端使利交橫布坑內更呼等類  
共跳並懼不敢天生乃復跳之往反十餘曾無  
留礙衆並歎服以兄死節為孝武所留心大明  
末為弋陽太守明帝泰始初與殷琰同逆被斬

### 許昭先傳

許昭先義興人也叔父肇之坐事繫獄七年不  
判子姪二十許人昭先家最貧薄專獨科訴無  
日在家餉饋肇之莫非珍新資產既盡賣宅以  
充之肇之諸子倦怠唯昭先無有懈怠如是七

南齊書卷一百一十一

一甲

載尚書沈演之嘉其操行肇之事由此得釋昭  
先舅夫妻並疫病死亡家貧無以殯送昭先賣  
衣物以營殯葬舅子三人並幼贍護皆得成長  
昭先父母皆老病家無僮役竭力致養甘旨必  
從宗黨嘉其孝行雍州刺史劉真道板為征虜  
參軍昭先以親老不就補迎主簿昭先以叔未  
仕又固辭

### 茶齊人傳

茶齊人晉陵晉陵人也少有孝行為邑書吏宋  
大明二年父殖在家病亡信未至齊人謂人曰



比者肉痛心煩有如割截居常惶駭必有異故  
信尋至以父病報之四百餘里一日而至至門  
方知父死號踊慟絕良父乃蘇問父所遺言母  
曰汝父臨終恨不見汝齊人即曰相見何難於  
是號叫殯所須吏便絕州縣上言有司奏改其  
里為孝義里蠲租布賜其母穀百斛

### 孫棘傳

孫棘彭城人也宋大明五年發三五丁弟薩應  
充行坐違期不至棘詣郡辭列棘為家長令弟  
不行罪應百死乞以身代薩薩又辭列自引太

南傳六十三

十七

守張岱疑其不實以棘薩各置一處報云聽其  
相代顏色並悅甘心赴死棘妻許又寄語屬棘  
君當門戶豈可委罪小郎且大家臨亡以小郎  
屬君竟未妻娶家道不立君已有二兒死復何  
恨岱依事表上孝武詔特原罪州加辟命并賜  
帛二十疋先是新蔡徐元妻許二十一喪夫子  
甄年三歲父攬愍其年少以更適同縣張買許  
自誓不行父逼載送買許自經氣絕家人奔赴  
良父乃蘇買夜送還攬許歸徐氏養元父季元  
嘉中八十餘卒又明帝泰始二年長城吳慶恩

殺同郡錢仲期子延慶屬役在都聞父死馳還於庾浦埭逢慶恩手刃殺之自繫烏程獄吳興太守欵顓表不加罪許之

### 何子平傳

何子平廬江瀟人也曾祖楷晉侍中祖友會稽王道子驃騎諮議參軍父子先建安太守子平世居會稽少有志行事母至孝揚州辟從事史月奉得白米輒貨市粟麥人曰所利無幾何足爲煩子平曰尊老在東不辦得米何心獨饗白粲每有贈鮮肴者若不可寄致至家則不肯授

百傳六三

一六

母本側庶籍注失實實未及養而籍年已滿便去職歸家時鎮軍將軍顧覲之爲州上綱謂曰尊上年實未八十親故所知州中差有微祿當啓相留子平曰公家正取信黃籍籍年既至便應扶持何容苟冒榮利乃歸家竭力供養元嘉三十年元凶弒逆隨王誕入討以爲行參軍子平以凶逆滅理故廢已受職事寧自解末除吳郡海虞令縣祿唯供養母一身不以及妻子人疑其儉薄子平曰希祿本在養親不在爲已問者慙而退母喪去官哀毀踰禮每至哭踊頓絕

方蘇屬大明末東土飢荒斷以師旅八年不得營葬晝夜號哭常如袒括之日冬不衣絮暑不避清涼一日以數合米爲粥不進鹽菜所居屋敗不蔽風日兄子伯興欲爲葺理子平不肯曰我情事未申天地一罪人耳屋何宜覆蔡興宗爲會稽太守甚加矜賞爲營冢壙子平居喪毀甚及免喪殆至不立幼持操檢躬厲名行雖處閭室如接大賓學義堅明處之以默安貧守善不求榮進好退之士彌以此貴之卒年六十

### 崔懷順傳

崔懷順清河東武城人也父邪利魯郡太守宋元嘉中爲魏所獲懷順與妻房氏篤愛聞父見虜即日遣妻布衣蔬食如居喪禮歲時北向流涕邪利後仕魏書戒懷順不許如此懷順得書更號泣懷順從叔模爲滎陽太守亦入魏模子雖居處改節不廢婚官宋大明中懷順宋人冀州刺史元孫北使魏魏人問之曰崔邪利模並力屈歸命二家子弟出處不同義將安在元孫曰王尊驅驥王陽回車欲令忠孝並弘臣子兩遂泰始初淮北入魏懷順因此歸北至代都而

邪利已卒懷順絕而後蘇載喪還青州徒跣冰雪土氣寒酷而手足不傷時人以爲孝感喪畢以弟在南齊建元初又逃歸而弟已亡懷順孤貧宗黨哀之日斂給其斗米永明中卒

### 王虛之傳

王虛之字文靜廬江石陽人也十三喪母三十喪父二十五年鹽酢不入口疾病著牀忽有一人來問疾謂之曰君病尋差俄而不見病果尋差庭中楊梅樹隆冬生實又每夜所居有光如燭墓上橘樹一冬再實時人咸以爲孝感所致齊永明中詔榜門蠲其三世時又有顧昌衍

江柔之江軻並以篤行知名昌衍吳人居喪幾致滅性王儉言之天子曰昌衍既有至行且張永之甥宜居禮闈以光郎署乃以爲書庫部郎柔之軻並濟陽人柔之字叔遠孝悌通亮亦至臺郎軻字伯倫貞嚴有行宗人江槩位至侍中性豪侈唯見軻則敬挹焉

### 吳慶之傳

吳慶之字文悅濮陽人也寓居江興宋江夏王義恭爲揚州召爲西曹書佐及義恭誅慶之自

傷為吏無狀不復肯仕終身蔬食後王琨為吳興太守欲召為功曹荅曰走素無人世情直以明府見接有禮所以奔走歲時若欲見吏則是蓄魚於樹栖鳥於泉耳不辭而退琨追謝之望塵不及矣

### 蕭叡明傳

蕭叡明字景濟南蘭陵人也母病風積年沉卧叡明晝夜祈禱時寒叡明下淚為之冰如筋額上叩頭血亦冰不溜忽有一人以小石函授之曰此療夫人病叡明跪受之忽不見以函奉母函中唯有三寸絹丹書為日月字母服之即平復于時秣陵朱緒無行母病積年忽思菰羹緒妻到市買菰為羹欲奉母緒曰病復安能食先嘗之遂併食盡母怒曰我病欲此羹汝何心併啖盡天若有知當令汝哽死緒便聞心中介介然即利血明日而死叡明聞之大悲慟不食積日問緒尸何在處欲手自戮之既而曰滂吾刀乃止永明五年居母喪不勝喪卒詔贈中書郎時又有鮮于文宗漁陽人年七歲喪父父以種芋時亡至明年芋時對芋嗚咽如此終身姊文

英適荀氏七日而夫亡執節不嫁及母卒晝夜  
哭泣遂喪明

蕭矯妻羊傳

蕭矯妻羊字淑禕性至孝居父喪哭輒吐血母  
嘗有疾淑禕於中夜祈禱忽見一人在樹下自  
稱枯桑君曰若人無患令泄氣在亥西南求白  
石鎮之言訖不見明日如言而疾愈又時有羊  
緝之女佩任者烏程人隨母還舅氏母亡晝夜  
號哭不飲食三日而亡鄉里號曰女表又有晉  
陵吳康之妻趙氏父亡弟幼遇歲飢母老病篤

兩卷六十一

二

趙詣鄉里告乞言辭哀苦鄉里憐之各分升米  
遂得免及嫁康之少時夫亡家欲更嫁誓死不  
貳焉又義興蔣雋之妻黃氏夫亡不重嫁家逼  
之欲自殺乃止建元三年詔蠲表門閭又會稽  
永興吳翼之母丁氏少喪夫性仁愛遭年荒分  
衣食以飴里中飢餓者隣里求借未嘗違同里  
陳攘父母死孤單無親戚丁收養之及長為營  
婚娶又同里王禮妻徐荒年客死丁陰為買棺  
器自往歛葬元徽末大雪商旅斷行村里比室  
飢餓丁自出鹽米計口分賦同里左倚家露四

喪無以葬丁爲辦冢椁有三調不登者代爲送  
丁長子婦王氏守寡執志不再醮州郡上言詔  
表門閭蠲租稅又會稽寒人陳氏有三女無男  
祖父母年八九十老無所知父篤瘡病母不安  
其室遇歲飢三女相率於西湖採菱蓴更日至  
市貨賣未嘗虧怠鄉里稱爲義門多欲娶爲婦  
長女自傷瘡獨誓不肯行祖父母尋相繼卒三  
女自營殯葬爲菴舍居墓側又永興概中里王  
氏女年五歲得毒病兩目皆盲性至孝年二十  
父死臨尸一叫眼皆血出小妹娥舐其血左目

即開時人稱爲孝感又諸暨東澗里屠氏女父  
失明母痼疾親戚相棄鄉里不容女移父母遠  
任紵舍晝採樵夜紡績以供養父母俱卒親營  
殯葬負土成墳忽空中有聲云汝至性可重山  
神欲相驅使汝可爲人療病必得大富女謂是  
魃魅弗敢從遂得病積時隣舍人有溪蟻毒者  
女試療之自覺病便差遂以巫道爲人療病無  
不愈家產日益鄉里多欲娶之女以無兄弟誓  
守墳墓不嫁爲山劫所殺又吳興乘公濟妻姚  
氏生二男而公濟及兄公願乾伯並卒各有一

子姚養育之賣田宅爲取婦自與二男寄止隣家明帝詔爲其二子婚表間復徭役又吳郡范法恂妻褚氏亦勤苦執婦業宋昇明中孫曇瓘謀反亡命褚謂其子僧簡曰孫越州先姑之姊子與汝父親則從母兄弟交則義重古人逃竄脫不免汝宜收之曇瓘等伏法褚氏令僧簡往斂葬年七十餘永明中卒僧簡在都聞病馳歸未至褚已卒將殯舉尸不起尋而僧簡至焉

### 公孫僧遠傳

公孫僧遠會稽剡人也居父喪至孝事母及伯

兩傳之二

廿二

父甚謹年饑僧遠省殮減食以養母及伯父兄弟亡貧無以葬身自販貼與隣里供斂送終之費躬負土手種松柏兄姊未婚嫁乃自賣爲之成禮名聞郡縣齊高帝即位遣兼散騎常侍虞炎等十二部使表列僧遠等二十三人詔並表門閭蠲租稅

### 吳欣之傳

吳欣之晉陵利城人也宋元嘉末弟慰之爲武進縣史隨王誕起義元凶遣軍主華欽討之吏人皆散慰之獨留見執將死欣之詣欽乞代弟



命辭淚哀切兄弟皆見原齊建元三年有詔蠲表之永明初廣陵人童超之二息犯罪爭死太守劉俊表以聞

### 韓係伯傳

韓係伯襄陽人也事父母謹孝襄陽人隣居種桑樹於界上爲誌係伯以桑枝蔭妨他地遷界上開數尺隣畔隨復侵之係伯輒更改種久之隣人慙愧還所侵地躬往謝之齊建元三年蠲表門閭以壽終時有吳興人聞人夔年十七結客報父仇爲高帝所賞位至長水校尉

### 丘冠先傳

丘冠先字道玄吳興烏程人也少有節義齊永明中位給事中時求使蠕蠕國尚書令王儉言冠先雖名位未升而義行甚重若爲行人則蘇武鄭衆之流也於是使蠕蠕蠕逼令拜冠先執節不從以刃臨之冠先曰能殺我者蠕蠕也不能以天子使拜戎狄者我也遂見殺武帝以冠先不辱命賜其子雄錢一萬布三十疋雄不受詣闕上書曰臣父執節如蘇武守死如谷吉遂不書之良史甄之褒策萬代之後誰死社稷

建元四年車僧卽銜使不異抗節是同詔贈正  
負外郎此天朝舊準臣父成例也今僧卽反葬  
冢塋臣父湮棄絕域語忠烈則亦不謝車輪荼  
苦則彼優而此劇名位不殊禮數宜等乞申哀  
贈書奏不省

### 孫淡傳

孫淡太原人也世居長沙事母至孝母疾不眠  
食以差爲期母哀之後有疾不使知也齊建元  
三年薨表門閭卒於家

### 華寶傳

華寶晉陵無錫人也父豪晉義熙末戍長安年  
八歲臨別謂寶曰須我還當爲汝上頭長安陷  
寶年至七十不婚冠或問之者輒號慟彌日不  
忍答也同郡薛天生母噎艱菜食天生亦菜食  
母未免喪而死天生終身不食魚肉又同郡劉  
懷胤與弟懷則年十歲遭父喪不衣絮帛不食  
鹽菜齊建元三年並表門閭

### 解叔謙傳

解叔謙字楚梁鴈門人也母有疾叔謙夜於庭  
中稽顙祈福聞空中語云此疾得丁公藤爲酒

便差即訪鑿及本草注皆無識者乃求訪至宜都郡遙見山中一老公伐木問其所用荅云此丁公藤療風尤驗叔謙便拜伏流涕具言來意此公愴然以四段與之并示以漬酒法叔謙受之顧視此人不復知處依法為酒母病即差齊建武初以奉朝請徵不至時又有宗元卿度震朱文濟匡昕魯康祚謝昌寓皆有素履而叔謙尤高元卿字希蔣南陽人有至行早孤為祖母所養祖母病元卿在途輒心痛大病則大痛小病則小痛以此為常鄉里宗事之號曰宗曾子

震字彥文新野人喪父母居貧無以葬賃書以營事至手掌穿然後葬事獲濟南陽劉虬因此為撰孝子傳文濟字敬達吳興人自賣以葬母太守謝瀹命為儒林不就昕字令先廬陵人有至性隱金華山服食不與俗人交母病亡已經日昕奔還號叫母即蘇皆以為孝感所致康祚扶風人亦有至行母患乳癰諸醫療不愈康祚乃跪兩手捧癰大悲泣母即覺小寬因此漸差時人以其有真應康祚位至屯騎校尉昌寓陳郡人也為劉俊廣州參軍孝性甚至嘗養一鵠

昌寓病二旬而鵠二旬不食昌寓亡而鵠遂飛去

### 韓靈敏傳

韓靈敏會稽剡人也早孤與兄靈珍並有孝性母尋又亡家貧無以營凶兄弟共種瓜朝採瓜子暮生已復遂辦葬事靈珍亡無子妻朝氏守節不嫁慮家人奪其志未嘗告歸靈敏事之如母

### 劉渢傳

劉渢字處和南陽人也父紹仕宋位中書郎渢

卷六十三

二二六

母早亡紹被敕納路太后兄女爲繼室渢年數歲路氏不以爲子奴婢輩捶打之無期度渢母亡日輒悲啼不食彌爲婢輩所苦路氏生謙兄渢怜愛之不忍捨怕在牀帳側輒被驅捶終不肯去路氏病經年渢晝夜不離左右每有增加輒流涕不食路氏病差感其意慈愛遂隆路氏富盛一旦爲渢立齋宇筵席不減侯王謙有識事渢過於同產事無大小必諮兄而後行渢妹適江柘弟禧與柘兄弟異常自尚書比部郎後爲遙光諮議專知腹心任時遙光任當顧託朝

野向颯如雲颯忌之求出爲丹楊丞雖外遷而  
意任無改及遙光舉事旦方召颯颯以爲宜悉  
呼佐史颯之徒丹楊丞也遙光以蕭懿第四弟  
晉安王之文學暢爲諮議領錄事及召入遙光  
謂曰劉暄欲有異志今夕當取之遙光去歲暴  
風性理乖錯多時方愈暢曰公去歲違和今欲  
發動顧左右急呼師視脉遙光厲聲曰諮議欲  
作異邪因訶令出須臾颯入暢謂曰公昔年風  
疾今復發颯曰卿視今夕處分云何而作此語  
及迎垣歷生至與颯俱勸夜攻臺旣不見納颯  
歷生並撫膺曰今欲作賊而坐守此城今年坐  
公滅族矣及遙光敗颯靜坐圍合濂爲度支郎  
亦奔亡遇颯仍不復肯去颯曰吾爲人作吏自  
不避死汝可去無相守同盡荅曰向若不逢兄  
亦草間苟免今旣相逢何忍獨生因以衣帶結  
兄衣俱見殺何胤聞之歎曰兄死君難弟死兄  
禍美哉又柳叔夜河東人父宗宋黃門郎叔夜  
年十六爲新野太守甚有名績補遙光諮議參  
軍及事敗左右扶上馬欲與俱亡荅曰吾已許  
始安以死豈可負之邪遂自殺

封延伯傳

封延伯字仲連勃海人也世爲州郡著姓寓居東海三世同財爲北州所宗附延伯好學退讓事寡嫂甚謹垣崇祖爲兗州請爲長史不就崇祖軾其門不肯相見後爲豫州上表薦之詔書優禮起家爲平西長史梁郡太守爲政清靜有高士風俄以疾免還東海于時四州入魏士子皆依海曲爭往宗之如遼東之仰邴原也建元三年大使巡行天下義興陳玄子四世同居一百七口武陵邵榮興文獻叔並八世同居東海

徐生之武陵范安祖李聖伯范道根並五世同居零陵譚弘寶衡陽何弘華陽陽黑頭踈從四世同居詔俱表門閭蠲租稅又蜀郡王績祖華陽郝道福並累世同爨建武三年明帝詔表門蠲調役

吳達之傳

吳達之義興人也嫂亡無以葬自賣爲十夫客以營冢椁從祖弟敬伯夫妻荒年被略賣江北達之有田十畝貨以贖之與同財共處之命爲主簿固以讓兄又讓世舊田與族弟弟亦不受

田遂閑廢齊建元三年詔表門閭先是有蔡曇智鄉里號蔡曾子廬江何伯璵兄弟鄉里號爲何展禽並爲高士沈顓所重常云聞蔡曇智之風怯夫勇鄙夫有立志聞何伯璵之風僞夫正薄夫厚云伯璵與弟幼璵俱厲節操養孤兄子及長爲婚推家業盡與之安貧枯槁誨人不倦郡守下車莫不脩謁伯璵卒幼璵末好佛法翦落長齋持行精苦梁初卒兄弟年八十餘

### 王文殊傳

王文殊字令章吳興故鄣人也父沒魏文殊思

百有六十一

二十九

慕泣血終身蔬食不衣帛服麻緼而已不婚不交人物吳興太守謝瀹聘爲功曹不就立小屋於縣西端拱其中歲時伏臘月朝十五未嘗不比望長悲如此三十餘年太守孔琇之表其行鬱林詔榜門改所居爲孝行里

### 樂頤之傳

樂頤之字文德南陽涅陽人也世居南郡少而言行和謹仕爲京府參軍父在郢病亡頤之忽悲戀涕泣因請假還中路果得父凶問便徒跣號咷出陶後渚遇商人附載西上水漿不入口

數日嘗遇病與母隔壁忍病不言嚙被至碎恐  
母之哀已也湘州刺史王僧虔引爲主簿以同  
僚非人棄官去吏部郎庾杲之嘗往候頤之爲  
設食唯枯魚菜菹杲之曰我不能食此母聞之  
自出常膳魚羹數種杲之曰卿過於茅季偉我  
非郭林宗仕至郢州中從事

弟預字文介亦至孝父臨亡執手以託郢州行  
事王英預悲感悶絕吐血數升遂發病官至驃  
騎錄事參軍隆昌末預謂丹楊尹徐孝嗣曰外  
傳籍藉似有伊周之事君蒙武帝殊常之恩荷

南齊書卷之三

北

託付之重恐不得同人此事人笑褚公至今齒  
冷無爲効尤孝嗣故吏吳興沈昇之亦說之曰  
昇之與君俱有項領之功今一言而二功俱解  
豈願聞之乎君受恩二祖而更參惟新之政以  
君爲反覆人事成則無處逃咎矣昇之草萊百  
姓言出禍已隨之孰與超然謝病高枕家園則  
與松柏比操風霜等烈豈不美邪孝嗣並改容  
謝之預建武中爲永世令人懷其德卒官時有  
一媪年可六七十擔擲藪葉造市貨之間預亡  
大泣棄溪中曰失樂令我輩孤獨老姥政應就



死耳市人亦皆泣其惠化如此

### 江泌傳

江泌字士清濟陽考城人也父亮之負外郎泌少貧晝日斫爨爲業夜讀書隨月光光斜則握卷升屋睡極墮地則更登性行仁義衣弊蟲多綿裹置壁上恐蟲飢死乃復置衣中數日間終身無復蟲母亡後以生闕供養遇鮭不忍食菜不食心以其有生意唯食老葉而已母墓爲野火所燒依新宮災三日哭淚盡繼之以血歷仕南中郎行參車所給募吏去役得時病莫有舍

事傳六十三

井一

之者吏扶杖投泌泌親自隱卹吏死泌爲買棺無僮役兄弟共輿埋之後領國子助教乘牽車至桑烏頭見一老公步行下車載之躬自步去齊武帝以爲南康王子琳侍讀建武中明帝害諸王後泌憂念子琳訪誌公道人問其禍福誌公覆香鑪灰示之曰都盡無餘及子琳被害泌往哭之淚盡續以血親視殯葬畢乃去泌尋卒族人兗州中從事泌黃門郎愈子也與泌同名世謂泌爲孝泌以別之

### 庾道愨傳

庾道愍潁川陽陵人晉司空冰之玄孫也有孝行頗能屬文少出孤悻時人莫知其所生母流漂交州道愍尚在襁褓及長知之求爲廣州綏寧府佐至南而去交州尚遠乃自負擔昌嶮僅得自達及至交州尋求母雖經年日夜悲泣嘗入村日暮雨驟乃寄止一家且有一嫗負薪外還而道愍心動因訪之乃其母也於是行伏號泣遠近赴之莫不揮淚道愍尤精相板宋明帝時山陽王休祐屢以言語忤顏見道愍託以已板爲他物令道愍占之道愍曰此乃甚貴然使人多愆忤休祐以褚顏回詳密求換其板他日彥回侍明帝自稱下官帝多忌甚不悅休祐具以狀言帝乃意解道愍仕齊位射聲校尉族孫沙彌亦以孝行著

沙彌晉司空冰之六世孫也父佩玉仕宋位長沙內史昇明中坐沈攸之事誅時沙彌始生及年五歲所生母爲製采衣輒不肯服母問其故流涕對曰家門禍酷用是何爲及長終身布衣蔬食爲中軍田曹行參軍嫡母劉氏寢疾沙彌晨昏侍側衣不解帶或應針灸輒以身先試及

母亡水漿不入口累日初進大麥薄飲經十旬  
方爲薄粥終喪不食監酢冬日不衣綿纊夏日  
不解衰絰不出廬戶晝夜號慟隣人不忍聞所  
坐薦淚霑爲爛墓在新林忽生旅松百許株枝  
葉鬱茂有異常松劉好噉甘蔗沙彌遂不食焉  
宗人都官尚書詠表言其狀應純孝之舉梁武  
帝召見嘉之以補歎令還除輕車邵陵王參軍  
事隨府會稽復丁所生憂喪還都濟浙江中流  
遇風舫將覆沒沙彌抱柩號哭俄而風靜咸以  
爲孝感所致後卒於長城令子持

廿三

持字元德少孤性至孝父憂居喪過禮篤志好  
學仕梁爲尚書左戶郎後兼建康監陳文帝爲  
吳興太守以爲郡丞兼掌書翰天嘉初爲尚書  
左丞封崇德縣子拜封之日請令史爲客受其  
餉遺文帝怒之因坐免後爲臨安令坐杖殺人  
免還爲給事黃門侍郎歷鹽官令祕書監知國  
史事又爲少府卿遷太中大夫領步兵校尉卒  
持善字書每屬辭好爲奇字文士亦以此譏之  
有集十卷

列傳第六十三

南史七十三

列傳第六十四

南史七十四

孝義下

滕曇恭

徐晉濟張悌

陶季直

沈崇僚

荀匠

吉玠

甄恬

趙拔扈

韓懷明

褚脩

張景仁

死陵女子劉景昕

衛敬瑜妻王

陶子鏘

成景雋

李慶緒

謝藺

子貞

殷不害

弟不佞

司馬騫

張昭

弟乾王知玄

滕曇恭傳

滕曇恭豫章南昌人也年五歲母楊氏患熱思食寒瓜土俗所不產曇恭歷訪不能得銜悲哀切俄遇一桑門問其故曇恭具以告桑門曰我有兩瓜分一相遺還以與母舉室驚異尋訪桑門莫知所在及父母卒曇恭並水漿不入口者旬日憾動嘔血絕而復蘇降冬不著繭絮蔬食終身每至忌日思慕不自堪晝夜哀動其門外有冬生樹二株時忽有神光自樹而起俄見佛像及夾侍之儀容光顯著自門而入曇恭家人大小咸共禮拜久之乃滅遠近道俗咸傳之太守王僧虔引曇恭為功曹固辭不就王儉時隨

僧虔在郡號爲滕曾子梁天監元年陸璉奉使  
巡行風俗表言其狀曇恭有子三人皆有行業  
時有徐普濟者長沙臨湘人居喪未葬而隣家  
火起延及其舍普濟號慟伏棺上以身蔽火隣  
人往救之焚炙已悶絕累日方蘇又有建康人  
張悌家貧無以供養以情告隣富人富人不與  
不勝忿遂結四人作劫所得衣服三劫持去實  
無一錢入已縣抵悌死罪悌兄松訢稱與弟景  
是前母子後母唯生悌松長不能教誨乞代悌  
死景又曰松是嫡長後母唯生悌若從法母亦  
不全亦請死母又云悌應死豈以弟罪柱及諸  
兄悌亦引分全兩兄供養縣以上讞帝以爲孝  
義特降死後不得爲例

### 陶季直傳

陶季直丹陽秣陵人也祖愍祖宋廣州刺史父  
景仁中散大夫季直早慧愍祖甚愛異之嘗以  
四函銀列置於前令諸孫各取其一季直時年  
四歲獨不取曰若有賜當先父伯不應度及諸  
孫故不取愍祖益竒之五歲喪母哀若成人初  
母未病令於外染衣卒後家人始贖季直抱之

號慟聞者莫不酸感及長好學澹於榮利徵召不起時人號曰聘君後爲望蔡令以病免時劉彥節袁粲以齊高帝權盛將圖之彥節素重季直欲與謀季直以袁劉儒者必致顛殞固辭不赴俄而彥節等敗齊初爲尚書比部郎時褚彥回爲尚書令素與季直善頗以爲司空司徒主簿委以府事彥回卒尚書令王儉以彥回有至行欲謚文孝公季直曰文孝是司馬道子謚恐其人非具美不如文簡儉從之季直又請爲彥回立碑始終營護甚有吏節再遷東莞太守在

郡號爲清和後爲鎮西諮議參軍齊武帝崩明帝作相誅鋤異己季直不能阿意取容明帝頗忌之出爲輔國長史北海太守邊職上佐素士罕爲之者或勸季直造門致謝明帝留以爲驃騎諮議參軍兼尚書左丞遷建安太守爲政清靜百姓便之梁臺建爲給事黃門侍郎常稱仕至二千石始願畢矣無爲久預人間事乃辭疾還鄉里梁天監初就拜太中大夫武帝曰梁有天下遂不見此人十年卒於家季直素清苦絕倫又屏居十餘載及死家徒四壁子孫無以殯

歛聞者莫不傷其志事云

### 沈崇僚傳

沈崇僚字思整吳興武康人也父懷明宋兗州刺史崇僚六歲丁父憂哭踊過禮及長事所生母至孝家貧常傭書以養天監二年太守柳惲辟為主簿崇僚從惲到郡還迎其母未至而母卒崇僚以不及侍疾將欲致死水漿不入口晝夜號哭旬日殆將絕氣兄弟謂曰殯葬未申遽自毀滅非全孝道也崇僚心悟乃稍進食母權瘞去家數里哀至輒之瘞所不避雨雪每倚墳

南傳

四

哀慟飛鳥翔集夜怕有猛獸來望之有聲狀如歎息者家貧無以遷厝乃行乞經年始獲葬焉既而廬于墓側自以初行喪禮不備復以葬後更行服三年久食麥屑不噉鹽酢坐卧於單薦因虛腫不能起郡縣舉至孝梁武聞即遣中書舍人慰勉之乃詔令釋服擢補太子洗馬旌其門閭崇僚奉詔釋服而涕泣如居喪固辭不受官乃除永寧令自以祿不及養哀思不自堪未至縣卒

### 荀匠傳

荀匠字文師潁陰人晉太保勗九世孫也祖瓊年十五復父仇於成都市以孝聞宋元嘉末度淮逢武陵王舉義為元凶追兵所殺贈貞外散騎侍郎父法起仕齊為安復令卒官匠號慟氣絕身體皆冷至夜乃蘇既而奔喪每宿江渚商侶不忍聞其哭聲梁天監元年其兄斐為鬱林太守征俚賊為流矢所中死於陣喪還匠迎于豫章望舟投水傍人赴救僅而得全及至家貧不時葬居父憂并兄服歷四年不出廬戶自括髮不復擲沐髮皆禿落哭無時聲盡則係之以泣目皆皆爛形骸枯頹皮骨裁連雖家人不復識郡縣以狀言武帝詔遣中書舍人為其除服擢為豫章王國左常侍匠雖即吉而毀頹逾甚外祖孫謙誡之曰生上以孝臨天下汝行過古人故擢汝此職非唯君父之命難拒故亦揚名後世所顯豈獨汝身哉匠乃拜竟以毀卒

### 吉盼傳

吉盼字彥霄馮翊蓮勺人也家居襄陽盼幼有孝性年十一遭所生母憂水漿不入口殆將滅性親黨異之梁天監初父為吳興原鄉令為吏



所誣逮詣延尉盼年十五號泣衢路祈請公卿  
行人見者皆為隕涕其父理雖清白而恥為吏  
訊乃虛自引咎罪當大辟盼乃搗登聞鼓乞代  
父命武帝異之尚以其童幼疑受教於人敕廷  
尉蔡法度嚴加脅誘取其款實法度乃還寺盛  
陳徽纒厲色問曰爾求代父死敕已相許便應  
伏法然刀鋸至劇審能死不且爾童孺志不及  
此必為人所教姓名是誰若有悔異亦相聽許  
對曰囚雖蒙弱豈不知死可畏憚顧諸弟幼藐  
唯囚為長不忍見父極刑自延視息所以內斷  
曾臆上千萬乘今欲殉身不測委骨泉壤此非  
細故奈何受人教邪法度知不可屈撓乃更和  
顏誘語之曰主上知尊侯無罪行當釋亮觀君  
神儀明秀足稱佳童今若轉辭幸父子同濟奚  
以此妙年苦求湯鑊盼白凡鯤鯨螻蟻尚惜其  
生況在人斯豈願齎粉但父挂深劾必正刑書  
故忍殞仆冀延父命盼初見囚獄掾依法備加  
桎梏法度矜之命脫其二械更令著一小者盼  
弗聽曰盼求代父死死囚豈可減乎竟不脫械  
法度以聞帝乃宥其父丹楊尹王志求其在廷

尉故事并諸鄉居欲於歲首舉充純孝玠曰異哉王尹何量玠之薄天父辱子死斯道固然若玠有覩面目當其此舉則是因父買名一何甚辱拒之而止年十七應辟爲本州主簿出監萬年縣攝官朞月風化大行自雍還郢湘州刺史抑忱復召爲主簿後秣陵鄉人裴儉丹陽郡守臧盾揚州中正張仄連名薦玠以爲孝行純至明通易老敕付太常旌舉初玠以父陷罪因成瘁疾後因發而卒

### 甄恬傳

甄恬字彥約中山無極人也世居江陵數歲喪父哀感有若成人家人矜其小以肉汁和飯飼之恬不肯食年八歲嘗問其母恨生不識父遂悲泣累日忽若有見言形貌則其父也時以爲孝感家貧養母常得珍羞及居喪廬於墓側恒有烏玄黃雜色集於廬樹恬哭則鳴哭止則止又有白鳩白雀栖宿其廬州將始興王憺表其行狀詔旌表門閭加以爵位恬官至安南行參軍

### 趙拔扈傳

趙拔扈新城人也兄震動富於財太守樊文茂求之不已震動怒曰無慮將及我文茂聞其語聚其族誅之拔扈走免亡命聚黨至社樹呪曰文茂殺拔扈兄今欲報之若事克斫樹處更生不克即死三宿三拊生十丈餘人間傳以爲神附者十餘萬旣殺文茂轉攻傍邑將至成都十餘日戰敗退保新城求降文茂黎州刺史文熾弟襄陽人也

### 韓懷明傳

韓懷明上黨人也客居荊州十歲母患尸疰每發輒危殆懷明夜於星下稽顙祈禱時寒甚切忽聞香氣空中有人曰童子母須臾永差無勞自苦未曉而母平復鄉里以此異之十五喪父幾至滅性負土成墳賻助無所受免喪與鄉人郭麻俱師南陽劉虬虬嘗一日廢講獨居涕泣懷明竊問虬家人荅云是外祖亡日時虬母亦已亡矣懷明聞之即日罷學還家就養虬歎曰韓生無立吾之恨矣家貧肆力以供甘脆嬉怡膝下朝夕不離母側母年九十以壽終懷明水漿不入口一旬號哭不絕聲有雙白鳩巢其廬

上字乳馴狎若家禽焉服釋乃去及除喪蔬食  
終身衣衾無所改梁天監初刺史始興王憺表  
言之州累辟不就卒于家

### 褚脩傳

褚脩吳郡錢唐人也父仲都善周易爲當時之  
冠梁天監中歷位五經博士脩少傳父業武陵  
王紀爲揚州引爲宣惠參軍兼限內記室脩性  
至孝父喪毀瘠過禮因患冷氣及丁母憂水漿  
不入口二十三日每號慟輒嘔血遂以毀卒

### 張景仁傳

張景仁傳

九

張景仁廣平人也父梁天監初爲同縣韋法所  
殺景仁時年八歲及長志在復讎普通七年遇  
法於公田渚手斬其首以祭父墓事竟詣郡自  
縛乞依刑法太守蔡天起上言於州時簡文在  
鎮乃下教褒美之原其罪下屬長蠲其一戶租  
調以旌孝行又天監中宣城宛陵女子與母同  
床眠母爲猛獸所取女啼號隨挈猛獸行數十  
里獸毛盡落獸乃置其母而去女抱母猶有氣  
息經時乃絕鄉里言於郡縣太守蕭琮表上詔  
榜其門閭又霸城王整之姊嫁爲衛敬瑜妻年

十六而敬瑜亡父母舅姑咸欲嫁之誓而不許  
乃截耳置盤中為誓乃止遂手為亡壻種樹數  
百株墓前柏樹忽成連理一年許還復分散女  
乃為詩曰墓前一株栢根連復並枝妾心能感  
木類城何足竒所住戶有鷲巢常雙飛來去梭  
忽孤飛女感其偏栖乃以縷繫脚為誅後歲此  
鷲果復更來猶帶前縷女復為誅曰昔年無偶  
去今春猶獨歸故人恩既重不忍復雙飛雍州  
刺史西昌侯藻嘉其美節乃起樓於門題曰貞  
義衛婦之間又表於臺後有河東劉景昕事母

南傳六十四

孝謹母常病癖三十餘年一朝而瘳鄉里以為  
景昕誠感荊州刺史湘東王繹辟為主簿

### 陶子鏘傳

陶子鏘字海育丹楊秣陵人也父延尚書比部  
郎兄尚宋末為倖臣所怨被繫子鏘公私緣素  
流血稽顙行路嗟傷逢謝超宗下車相訪回入  
縣詣建康令勞彥遠曰豈忍見人昆季如此而  
不留心勞感之兄得釋母終居喪盡禮與范雲  
隣雲每聞其哭聲必動容改色欲相申薦會雲  
卒初子鏘母嗜尊母沒後怕以供奠梁武義師

初至此年冬營尊不得子鏘痛恨慟哭而絕父之乃蘇遂長斷尊味

### 成景雋傳

成景雋字超范陽人也祖興仕魏爲五兵尚書父安樂淮陽太守梁天監六年常邕和殺安樂以城內附景雋謀復讎因殺魏宿預城主以地南入普通六年邕和爲鄱陽內史景雋購人刺殺之未久重購邕和家人鳩殺其子弟唯類俱盡武帝義之每爲屈法景雋家讎旣雪每思報効後除北豫州刺史侵魏所向必摧其智勇時以比馬仙理兼有政績見懷北豫州吏人樹碑紀德卒謚曰忠烈云

### 李慶緒傳

李慶緒字孝緒廣漢郿人也父爲人所害慶緒九歲而孤爲兄所養日夜號泣志在復讎投州將陳顯達仍於部伍白日手刃其仇自縛歸罪州將義而釋之梁天監中爲東莞太守丁母憂去職廬于墓側每慟嘔血數升後爲巴郡太守號良吏累遷衛尉封安陸縣侯益州一二百年無復貴仕慶緒承恩至此便欲西歸尋徙太子

右衛率未拜而卒

謝蘭傳

謝蘭字希如陳郡陽夏人晉大傳安之八世孫也父經北中郎諮議參軍蘭五歲時父未食乳媪欲令先飯蘭終不進舅阮孝緒聞之歎曰此兒在家則曾子之流事君則蘭生之匹因名曰蘭稍授以經史過目便能諷誦孝緒每曰吾家陽元也及丁父憂晝夜號慟毀瘠骨立母阮氏常自守視譬抑之服闕吏部尚書蕭子顯嘉其至行擢爲王府法曹行參軍累遷外兵記室參

西傳卷之四

二二

軍時甘露降士林館蘭獻頌武帝嘉之有詔使製北兖州刺史蕭楷德政碑又奉詔令製宣城王奉述中庸頌後爲兼散騎常侍使魏會侯景入附境土交兵蘭母旣慮不得還感氣而卒及蘭還入境夜夢不祥旦便投列馳歸及至號慟嘔血氣絕久之水漿不入口每哭眼耳口鼻皆血流經月餘日因夜臨而卒所製詩賦碑頌數十篇子貞

貞字元正幼聰敏有至性祖母阮氏先苦風眩每發便一二日不能飲食貞時年七歲祖母不

食貞亦不食往往如此母王氏授以論語孝經  
讀訖便誦八歲嘗爲春日閑居詩從舅王筠奇  
之謂所親曰至如風定花猶落乃追步惠連矣  
年十三尤善左氏春秋工草隸蟲篆十四丁父  
艱號頓於地絕而復蘇者數矣初貞父蘭以憂  
毀卒家人賓客復憂貞從父洽族兄嵩乃共請  
華嚴寺長瓜禪師爲貞說法仍誓以母須侍養  
不宜毀滅乃少進饘粥及魏剋江陵入長安嵩  
逃難畚禺貞母出家于宣明寺及陳武帝受禪  
嵩還鄉里供養貞母將二十年初貞在周嘗侍

周武帝愛弟趙王招讀招厚禮之聞其獨處必  
晝夜涕泣私問知母在鄉乃謂曰寡人若出居  
藩當遣侍讀還家後數年招果出因辭百奏請  
放貞還帝奇招仁愛遣隨聘使杜子暉歸國是  
歲陳太建五年也始自周還時始興王叔陵爲  
揚州刺史引祠部侍郎阮卓爲記室辟貞爲主  
簿尋遷府錄事參軍領丹陽丞貞知叔陵有異  
志因與卓自踈每有宴遊輒以疾辭永嘗參預  
叔陵雅重之弗之罪也及叔陵肆逆唯貞與卓  
不坐再遷南平王友掌記室事府長史汝南周



確新除都官尚書請貞為讓表後主覽而竒之  
及問知貞所作因敕舍人施文慶曰謝貞在王  
家未有祿秩可賜米百石以母憂去職頃之敕  
起還府累啓固辭敕不許貞哀毀羸瘠終不能  
之官舍吏部尚書姚察與貞友善及貞病篤問  
以後事貞曰孤子豐禍所集將隨灰壤族子凱  
等粗自成立已有䟽附之此固不足仰塵厚德  
弱兒年甫六歲名靖字依仁情累所不能忘敢  
以為託長夜卒後主問察曰謝貞有何親屬察  
以靖答即敕長給衣糧初貞之病有遺䟽告族

南傳十四

十四

子凱氣絕之後若依僧家尸隨林法是吾所願  
正恐過為獨異可用薄板周身載以露車覆以  
草席坎山次而埋之又靖年尚小未閱人事但  
可三月施小床設香水盡鄉兄弟相厚之情即  
除之無益之事勿為也

### 殷不害傳

殷不害字長卿陳郡長平人也祖汪齊豫章王  
行參軍父高明梁尚書兵部郎不害性至孝居  
父憂過禮由是少知名家世儉約居甚貧窶有  
第五人皆幼弱不害事老母養小第勤劇無所

不至士大夫以篤行稱之年十七仕梁為廷尉  
平長於政事兼飾以儒術名法有輕重不便者  
輒上書言之多見納用大同五年兼東宮通事  
舍人時朝政多委東宮不害與舍人庾肩吾直  
日奏事梁武帝嘗謂肩吾曰卿是文學之士吏  
事非卿所長何不使殷不害來邪其見知如此  
簡文以不害善事親賜其母蔡氏錦裙襦氍席  
被褥單複畢備侯景之亂不害從簡文入臺及  
臺城陷簡文在中書道景帶甲將兵入朝陛見  
過謁簡文左右甚不遜侍衛者莫不驚恐辟易

唯不害與中庶子徐摛侍側不動簡文為景所  
幽遣人請不害與居處景許之不害供侍益謹  
梁元帝立以不害為中書郎兼廷尉卿魏平江  
陵失母所在時甚寒雪凍死者填滿溝壑不害  
行哭尋求聲不暫輟過見死人溝中即投身捧  
視舉體凍僵水漿不入口者七日始得母屍憑  
屍而哭每輒氣絕行路皆為流涕即江陵權殯  
與王褒庾信俱入長安自是蔬食布衣枯槁骨  
立見者莫不哀之太建七年自周還陳除司農  
卿遷晉陵太守在郡感疾詔以光祿大夫徵還

養疾後主即位加給事中初不害之還也周留其長子僧首因居關中禎明三年陳亡僧首來迎不害道卒年八十五不害弟不佞

不佞字季卿少立名節居父喪以至孝稱好讀書尤長吏術梁承聖初爲武康令時兵荒飢饉百姓流移不佞循撫招集緡負至者以千數會魏剋江陵而母辛道路隔絕久不得奔赴四載之中晝夜號泣居處飲食常爲居喪之禮陳武帝受禪除婁令至是第四兄不齊始於江陵迎母喪柩歸葬不佞居處之節如始聞問若此者

又三年身自負土手植松柏每歲時伏臘必三日不食文帝時兼尚書右丞遷東宮通事舍人及廢帝嗣立宣帝爲太傅錄尚書輔政甚爲朝望所歸不佞素以名節自立又受委東宮乃與僕射到仲舉中書舍人劉師知尚書左丞王暹等謀矯詔出宣帝衆人猶豫未敢先廢不佞乃馳詣相府面宣詔旨令相王還第及事發仲舉等皆伏誅宣帝雅重不佞特赦之免其官而已及即位以爲軍師始興王諮議參軍後兼尚書左丞加通直散騎常侍卒官不佞兄不疑不齊並

早亡事第二寡嫂張氏甚謹所得祿奉不入私室長子梵童位尚書金部郎

司馬嵩傳

司馬嵩字文昇河內温人也高祖柔之晉侍中以南頓王孫紹齊文獻王攸後父子產即梁武帝之外兄也位岳陽太守嵩幼聰警有至性年十二丁內艱孺慕過禮水漿不入口殆經一旬每號慟必至悶絕父母喻之令進粥然猶毀瘠骨立服闕以姻戚子弟入問訊梁武帝見其羸疾歎息久之字其小字謂其父曰昨見羅兒面顏顛顛使人惻然便是不墜家風爲有子矣後累遷正員郎丁父艱哀毀愈甚廬于墓側日進薄麥粥一升墓在新林連接山阜舊多猛獸嵩結廬數載豺狼絕迹常有兩鳩栖宿廬所馴狎異常承聖中除太子庶子魏剋江陵隨例入長安而梁宗屠戮太子殞瘞失所及周受禪嵩以宮臣乃抗表求還江陵改葬辭甚酸切周朝優詔答之即敕荊州以禮安厝陳太建八年自周還宣帝特降殊禮歷位通直散騎常侍太中大夫卒有集十卷子延義字希忠少沈敏好學初

隨父入關丁母憂喪過于禮及高還都延義我乃躬負靈櫬晝伏宵行冒履冰霜手足皸瘃至都遂致孳廢數年乃愈位司徒從事中郎

### 張昭傳

張昭字德明吳郡吳人也幼有孝性父熯常患消渴嗜鮮魚昭乃身自結網捕魚以供朝夕弟乾字玄明聰敏好學亦有至性及父卒兄弟並不衣綿帛不食鹽酢日唯食一升麥屑粥每一感慟必致歐血隣里聞之皆爲涕泣父服未終母陸氏又卒兄弟遂六年哀毀形容骨立家貧

未得大葬遂布衣蔬食十有餘年杜門不出屏絕人事時衡陽王伯信臨郡舉乾孝廉固辭不就兄弟並因毀成疾昭一眼失明乾亦中冷苦癖年並未五十終于家子胤俱絕宣帝時有太原王知玄者僑居會稽剡縣居家以孝聞及丁憂哀毀而卒帝嘉之詔改所居青苦里爲孝家里

論曰自澆風一起人倫毀薄蓋抑引之教導俗所先變里旌閭義存勸獎是以漢世士務脩身故忠孝成俗至于乘軒服冕非此莫由晉宋以

來風衰義缺刻身厲行事薄膏腴若使孝立閭  
庭忠被史策多發溝畎之中非出衣簪之下以  
此而言聲教不亦卿大夫之恥乎

列傳第六十四

南史七十四



